

Aruba a perde un gran yiu di tera, compositor y cantautor, Vicente Kelly



ORANJESTAD (AAN): Cu profundo tristesa partido MEP a tuma nota di fayecimento di e gran compositor, musico y cantautor Arubano awe den feliz memoria Vicente Kelly. Sin duda cu Vicente Kelly ta un musico unico cu a marca su nomber den historia musical na Aruba caminda cu su persona - pa medio di su composicion-

nan creativo y yen di humor – pa decadanan largo a presenta tur loke ta biba bao di e pueblo Arubano.

Cu e fayecimento di Vicente Kelly Aruba a perde un gran yiu di tera cu a hiba nomber di Aruba te den exterior y causando furor cu su canticanan original.

Na bida Vicente Kelly

tabata e bode/chauffeur di nos Libertador Betico Croes pa ken Vicente tabatin un aprecio, fieldad y respet hopi grandi.

Pa recorda e gran Arubiano aki na bida, dia 18 di maart 2012 partido MEP a organisa su actividad di Dia di Himno y Bandera na Cede Libertador Betico Croes na Santa Cruz y na



e ocasion aki a brinda un homenahe y reconocemento special na e gran cantautor di pueblo Vicente Kelly. E dia ey dilanti di e publico presente Vicente Kelly a canta algun di su canticanan popular y na final Lider di MEP, Evelyn Wever Croes a gradici Vicente Kelly den presencia di su famia pa tur loke el a

haci pa enriquece e cultura y musica Arubano.

Un biaha mas partido MEP ta gradici Vicente Kelly pa tur su trabaonan riba terreno musical y ta desea su señora, su yiunan y demas famia hopi forza den e dianan aki.

Cu Vicente sosega dushi den brasa di nos Señor.